



Број/ Број : 02/2-50-1-23-34/09

Сарајево/ Сарајево: 10.11.2009. године

ZAPISNIK

34. sjednice Komisije za vanjsku i trgovinsku politiku, carine, saobraćaj i komunikacije

Doma naroda

Parlamentarne skupštine Bosne i Hercegovine, održane 10.11.2009. godine

Sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH (u daljnjem tekstu: Komisija) sazvala je predsjedavajuća Komisije Alma Čolo.

Sjednici Komisije su, u svojstvu članova, prisustvovali: Alma Čolo, Dušanka Majkić, Adem Ibrahimpašić i Slobodan Šaraba, te Nenad Pandurević, sekretar, i Dobrinka Savić, stručni saradnik u Komisiji. Odsustvo su opravdali Božo Ljubić i Branko Zrno.

Sjednici su, u svojstvu predlagача i izvjestilaca, prisustvovali: Dušan Nešković, pomoćnik ministra za poljoprivredu, ishranu, šumarstvo i ruralni razvoj u Ministarstvu vanjske trgovine i ekonomskih odnosa BiH, Samir Sabljica, šef odsjeka, i Elda Hodžić-Isović, stručni saradnik u Ministarstvu vanjske trgovine i ekonomskih odnosa BiH, Almir Kapisazović, šef odsjeka u Ministarstvu finansija i trezora BiH, Alija Muminović, šef odsjeka u Ministarstvu vanjskih poslova BiH, Savo Marjanac, direktor Sektora privrede u Vanjskotrgovinskoj komori BiH, Lenka Kozić, direktor Agencije za nadzor nad tržištem BiH, i Medina Delalić, viši stručni saradnik u Sektoru za odnose s javnošću u PSBiH.

Sjednica Komisije počela je u 13 sati.

Nakon što je konstatirala da postoji kvorum, predsjedavajuća Komisije Alma Čolo predložila je sljedeći

DNEVNI RED

1. Usvajanje Zapisnika 33. sjednice Komisije;
2. Razmatranje Prijedloga zakona o općoj sigurnosti proizvoda (prva komisijska faza), predlagač: Vijeće ministara BiH;
3. Razmatranje Prijedloga zakona o izmjenama i dopunama Zakona o nadzoru nad tržištem u BiH (prva komisijska faza), predlagač: Vijeće ministara BiH;
4. Razmatranje Prijedloga zakona o duhanu BiH (prva komisijska faza), predlagač: Vijeće ministara BiH;
5. Davanje saglasnosti za ratificiranje Sporazuma između Vijeća ministara BiH i Vlade Kraljevine Danske o razvojnoj saradnji;
6. Davanje saglasnosti za ratificiranje Sporazuma o finansiranju između Bosne i Hercegovine i Komisije Evropskih zajednica u pogledu "Jadranskog prekograničnog programa saradnje u okviru IPA-e" u okviru instrumenta pretpristupne pomoći;
7. Razmatranje informacija Ministarstva vanjskih poslova BiH:
 - Informacija o sastanku ministara odbrane Evropske unije, Geteborg, 29.9.2009.;
 - Liberalizacija viznog režima - Informacija Misije BiH pri EU o razgovorima s pojedinim članovima COWEB-a;
 - Liberalizacija viznog režima – sjednica Komiteta za građanske slobode, pravdu i unutrašnje poslove Evropskog parlamenta (LIBE), Strazbur, 19.10.2009.;
 - Liberalizacija viznog režima – Informacija Misije BiH pri EU o sastanku u Generalnom direktoratu za pravdu, slobode i sigurnost, Brisel, 14.10.2009.;
 - Informacija o sjednici Vijeća EU za vanjske poslove, Luksemburg, 27.10.2009. godine – Diskusija o BiH tokom neformalne večere ministara vanjskih poslova zemalja članica EU;
 - Izjava Eduarda Kukana, šefa delegacije Evropskog parlamenta za odnose s Albanijom, BiH, Crnom Gorom i Kosovom, u vezi sa Izvještajem Evropske komisije o napretku za države zapadnog Balkana;
 - Informacija o rezultatima parlamentarnih izbora u SR Njemačkoj, održanih 27.9.2009.
8. Razmatranje izvještaja o međunarodnim aktivnostima komisija i parlamentarnih delegacija PSBiH:
 - Izvještaj s četvrtog dijela redovnog zasjedanja Parlamentarne skupštine Vijeća Evrope za 2009. godinu, Strazbur, od 28. 9. do 2. 10. 2009.;

- Zabilješka sa zajedničkog sastanka Komisije za vanjsku i trgovinsku politiku, carine, saobraćaj i komunikacije Doma naroda i Komisije za vanjsku trgovinu i carine Predstavničkog doma s delegacijom Grupe prijateljstva Parlamenta Islamske Republike Iran;

9. Tekuća pitanja:

- Vijeće Evrope: Kandidatura Evropske demokratske grupe za predsjedavanje PSVE za 2010.godinu;
- Zabilješka sa zajedničkog sastanka Komisije za vanjsku i trgovinsku politiku, carine, saobraćaj i komunikacije Doma naroda i Komisije za vanjske poslove Predstavničkog doma s novoimenovanim šefovima diplomatsko-konzularnih predstavništava BiH.

Predloženi dnevni red usvojen je jednoglasno.

Ad. 1. Usvajanje Zapisnika 33. sjednice Komisije

Zapisnik 33. sjednice Komisije usvojen je jednoglasno.

Ad. 2. Razmatranje Prijedloga zakona o općoj sigurnosti proizvoda (prva komisijska faza), predlagač: Vijeće ministara BiH

Na početku je predsjedavajuća Komisije Alma Čolo informirala prisutne da se Prijedlog zakona razmatra u skladu s članom 98. Poslovnika, tj. radi dostavljanja Domu naroda mišljenja o principima predloženog zakona, a nakon toga je podsjetila na dosadašnju proceduru ovog zakona u Parlamentarnoj skupštini BiH. Istakla je da je Vijeće ministara BiH, kao ovlašteni predlagač, dostavilo Prijedlog zakona o općoj sigurnosti proizvoda Parlamentarnoj skupštini BiH, 25.9.2009., radi razmatranja po osnovnom zakonodavnom postupku. Dalje je podsjetila prisutne da je Ustavnopravna komisija Doma naroda Parlamentarne skupštine BiH, na 45. sjednici, održanoj 5.11.2009., razmatrala Prijedlog zakona i utvrdila da postoji valjan ustavnopravni osnov za usvajanje navedenog zakona kao i usaglašenost sa Ustavom i pravnim sistemom BiH. Predstavnički dom usvojio je Prijedlog zakona u drugom čitanju na 63. sjednici, održanoj 4.11.2009., bez amandmana.

Predsjedavajuća je u nastavku upoznala prisutne da je, shodno odredbama člana 98. Poslovnika Doma naroda, zatraženo i dobiveno mišljenje Direkcije za evropske integracije BiH u kojem je, između ostalog, navedeno da je „Evropskim partnerstvom predviđeno usvajanje izmjena i dopuna Zakona o općoj sigurnosti proizvoda s ciljem detaljnijeg i preciznijeg definiranja pojedinih formulacija i dijelova zakona, te osiguranja da Agencija za nadzor nad tržištem BiH bude potpuno funkcionalna“. U mišljenju je dalje konstatirano da su Prijedlogom zakona preuzete pojedine odredbe dvije relevante direktive Evropskog parlamenta i Vijeća, te da je utvrđeno da je Prijedlog zakona o općoj sigurnosti proizvoda djelimično usklađen s tim direktivama.

Nakon uvodnog obrazloženja, predsjedavajuća je otvorila raspravu o Prijedlogu zakona.

Samir Sabljica, predstavnik predlagača Zakona, rekao je da smatra da nije potrebno dodatno obrazloženje za ovaj prijedlog zakona, jer je detaljno obrazloženje dostavljeno uz sam tekst Prijedloga, gdje je naveden ustavni osnov, razlozi za donošenje novog zakona kao i usklađenost s Evropskim zakonodavstvom. Istakao je da su u dostavljenom prilogu detaljno obrazložena predložena rješenja i dostavljena mišljenja: Ministarstva finansija i trezora BiH, Ureda za zakonodavstvo, Vijeća ministara BiH, Ministarstva pravde BiH i Direkcije za evropske integracije s uporednim prikazom i izjavama o usklađenosti.

Dušanka Majkić stavila je primjedbu na način dostavljanja materijala na razmatranje PSBiH u pogledu jezika i samog izgleda akta. Zamolila je da se ubuduće obrati pažnja na lektoriranje te da akti koji su pisani ćirilичnim pismom budu na srpskom jeziku. Naglasila je da je 2004. godine usvojen sličan zakon te da se sada radi samo o usklađivanju sa zakonodavstvom Evropske unije preuzimanjem Direktive o općoj sigurnosti proizvoda i Direktive o opasnim imitacijama. Istakla je da će podržati ovaj prijedlog zakona jer smatra da nije došlo do povrede nadležnosti entiteta, što potvrđuju čl. 7., 8., 12. i 16. predloženog zakona.

Nakon provedene rasprave, Komisija je jednoglasno podržala principe Prijedloga zakona o općoj sigurnosti proizvoda u BiH.

Za izvjestioca na sjednici Doma naroda imenovana je Alma Čolo, predsjedavajuća Komisije.

Ad. 3. Razmatranje Prijedloga zakona o izmjenama i dopunama Zakona o nadzoru nad tržištem u BiH (prva komisijska faza), predlađač: Vijeće ministara BiH

I za ovaj prijedlog zakona predsjedavajuća Komisije Alma Čolo je na početku rekla da se razmatra u skladu s članom 98. Poslovnika, tj. radi dostavljanja Domu naroda mišljenja o principima predloženog zakona, te je nakon toga podsjetila na dosadašnju proceduru ovog zakona u Parlamentarnoj skupštini BiH.

Predsjedavajuća je podsjetila da je Vijeće ministara BiH, kao ovlašteni predlađač, dostavilo Prijedlog zakona o izmjenama i dopunama Zakona o nadzoru nad tržištem u BiH Parlamentarnoj skupštini BiH, 25.9.2009., radi razmatranja po osnovnom zakonodavnom postupku. Dodala je da je Ustavnopravna komisija Doma naroda Parlamentarne skupštine BiH, na 45. sjednici, održanoj 5.11.2009., razmatrala Prijedlog zakona i utvrdila da postoji valjan ustavnopravni osnov za usvajanje navedenog zakona kao i usaglašenost sa Ustavom i pravnim sistemom BiH. Predstavnički dom usvojio je Prijedlog zakona u drugom čitanju na 63. sjednici održanoj, 4.11.2009., bez amandmana.

Predsjedavajuća je informirala prisutne da je, shodno odredbama člana 98. stav (2), zatraženo i dobiveno mišljenje Direkcije za evropske integracije BiH u kojem je, između ostalog, navedeno da je Evropskim partnerstvom predviđeno donošenje Zakona o izmjenama i dopunama Zakona o nadzoru nad tržištem u BiH kako bi se osiguralo da Agencija za nadzor nad tržištem bude potpuno funkcionalna. U mišljenju se konstatira da su Prijedlogom zakona preuzete pojedine odredbe dvije relevantne direktive Evropskog parlamenta i Vijeća, te da je utvrđeno da je Prijedlog zakona o izmjenama i dopunama Zakona o nadzoru nad tržištem u BiH djelimično usklađen s tim direktivama.

Nakon kraće rasprave u kojoj su učestvovali: Slobodan Šaraba, Dušanka Majkić i Samir Sabljica, Komisija je, s tri glasa “za” i jednim “suzdržanim” glasom, podržala principe Prijedloga zakona o izmjenama i dopunama Zakona o nadzoru nad tržištem u BiH.

Za izvjestioca na sjednici Doma naroda imenovana je Alma Čolo, predsjedavajuća Komisije.

**Ad. 4. Razmatranje Prijedloga zakona o duhanu BiH (prva komisijska faza),
predlagač: Vijeće ministara BiH**

Predsjedavajuća Alma Čolo dala je uvodne napomene o dosadašnjoj proceduri ovog zakonskog rješenja. Istakla je da je Vijeće ministara BiH, kao ovlašteni predlagač, dostavilo Prijedlog zakona o duhanu BiH Parlamentarnoj skupštini BiH, 30.9.2009., radi razmatranja po osnovnom zakonodavnom postupku. Podsjetila je da se Prijedlog zakona razmatra u skladu s članom 98. Poslovnika, tj. radi dostavljanja Domu naroda mišljenja o principima predloženog zakona. Ustavnopravna komisija Doma naroda Parlamentarne skupštine BiH je, na 45. sjednici, održanoj 5.11.2009., razmatrala Prijedlog zakona i utvrdila da postoji valjan ustavnopravni osnov za usvajanje navedenog zakona kao i usaglašenost sa Ustavom i pravnim sistemom BiH. Predstavnički dom usvojio je Prijedlog zakona u prvom čitanju na 63. sjednici, održanoj 4.11.2009. U nastavku je informirala da je, također, zatraženo i dobiveno mišljenje Direkcije za evropske integracije BiH u kojem je, između ostalog, navedeno da je „Prijedlog zakona djelimično usklađen s Direktivom Vijeća (EZ) br. 95/59 u odredbi člana 5. stava (5) tač. a), b), c) i d)“.

Dušan Nešković, pomoćnik ministra za poljoprivredu, ishranu, šumarstvo i ruralni razvoj u Ministarstvu vanjske trgovine i ekonomskih odnosa BiH, dao je uvodno obrazloženje za ovaj prijedlog zakona. Istakao je da je sačinjen na zahtjev Komisije Predstavničkog Doma PSBiH te da je Ministarstvo prihvatilo taj zahtjev i organiziralo konsultacije svih učesnika i strana zainteresiranih za ovu oblast. Radi se o zakonskom rješenju koje će ujednačiti uslove privređivanja u oblasti proizvodnje, prerade duhana i plasmana proizvoda na tržištu i u isto vrijeme napraviti vezu između svih subjekata u lancu (sadjnja, otkup, obrada, prerada, proizvodnja, pakovanje, prodaja) proizvodnje duhana i duhanskih proizvoda. Ovaj zakon je u direktnoj vezi sa zaštitom domaće proizvodnje i kontrolom domaćeg tržišta, jer predviđa veće korištenje duhana proizvedenog na domaćem tržištu, što bi povećalo domaću proizvodnju i otvorilo prostor za smanjenje uvoza duhana i svakako pozitivno uticalo na pokrivenost uvoza izvozom. Istakao je da je Prijedlog zakona urađen transparentno sa svim zainteresiranim učesnicima i da je dobio opću saglasnost za upućivanje u parlamentarnu proceduru.

Dušanka Majkić podsjetila je na to koliko je polemika izazvao Prijedlog zakona o duhanu u prethodnom sazivu te da se tada nije moglo doći do dogovora. Podsjetila je da ni tada niko nije osporavao potrebu za donošenjem takvog zakona ali su mišljenja subjekata

uključenih u izradu zakona bila toliko različita da nije došlo do njegovog usvajanja. Dalje je kazala da će podržati principe ovog prijedloga zakona ali je dodala da ima dva pisma. Jedno pismo je od Ministarstva poljoprivrede, vodoprivrede i šumarstva Republike Srpske u kojem se konstatira da primjedbe i sugestije tog ministarstva na Prijedlog zakona o duhanu nisu uvažene ni ugrađene u Prijedlog zakona. Drugo pismo je od Republičke uprave za inspekcijske poslove, Sektor poljoprivredne inspekcije iz Banje Luke, u kojem je navedeno da su dostavljene primjedbe na Prijedlog zakona koje nisu uvažene, osim prijedloga da se promijeni naziv zakona. Dodala je da ovo, prema njenom mišljenju, znači da će biti mnogo amandmana na ovaj prijedlog zakona.

Elda Hodžić-Isović, iz Ministarstva vanjske trgovine i ekonomskih odnosa BiH, u svom odgovoru konstatirala je da su primjedbe Ministarstva poljoprivrede iz Republike Srpske bile uglavnom u vezi s prijenosom nadležnosti. Međutim, dodala je da osnova za takvo nešto uopće nema. Pojasnila je da je Ministarstvo vanjske trgovine i ekonomskih odnosa BiH nadležno da pomaže i koordinira u provođenju zakona dok je provođenje zakona na terenu u potpunosti u nadležnosti entitetskih ministarstava i Brčko Distrikta BiH.

Adem Ibrahimpašić istakao je da se raduje što se neke stvari o kojima je on uporno govori u svom parlamentarnom radu konačno počinju rješavati. Podsjetio je na svoje zalaganje za rješavanja problema s akcizama na kafu ili etanol, koji su riješeni ili se na njihovom rješavanju radi, a evo sada je na red došao i duhan, odnosno cigarete. Podsjetio je da slična zakonska rješenja Republika Hrvatska ima u svom zakonu, što punih 12 godina onemogućava izvoz bosanskohercegovačkih cigareta u tu zemlju. Pozdravio je dostavljanje ovakvog prijedloga zakona u parlamentarnu proceduru i istakao da će pružiti punu podršku njegovom donošenju.

Slobodan Šaraba izrazio je čuđenje sto veći broj primjedbi Ministarstva poljoprivrede i drugih institucija iz Republike Srpske nije ugrađen u Prijedlog zakona. Izrazio je zabrinutost zbog takve situacije jer se to može odraziti na parlamentarnu proceduru donošenja ovog zakona.

Nakon provedene rasprave, Komisija je jednoglasno podržala principe Prijedloga zakona o duhanu BiH.

Na prijedlog predsjedavajuće, Komisija je jednoglasno usvojila i sljedeći zaključak koji upućuje Domu naroda:

“S obzirom da Predstavnički dom Parlamentarne skupštine BiH još nije završio proceduru usvajanja Prijedloga zakona o duhanu BiH, produžava se amandmanska faza za ovaj prijedlog zakona do 48 sati prije održavanja sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH na kojoj će biti razmatran”.

Za izvjestioca na sjednici Doma naroda imenovana je Alma Čolo, predsjedavajuća Komisije.

A.d.5. Davanje saglasnosti za ratificiranje Sporazuma između Vijeća ministara BiH i Vlade Kraljevine Danske o razvojnoj saradnji

Predsjedavajuća Komisije Alma Čolo naglasila je da je ovaj sporazum u nadležnosti Ministarstva vanjskih poslova BiH te da Predstavnički dom nije još razmatrao ovaj sporazum. Konstatirala je da je prisutan predstavnik nadležnog ministarstva i predložila da se uključi u raspravu ako članovi Komisije budu imali pitanja.

Nakon što nije bilo pitanja, članovi Komisije jednoglasno su odlučili predložiti Domu naroda davanje saglasnosti za ratifikaciju Sporazuma između Vijeća ministara BiH i Vlade Kraljevine Danske o razvojnoj saradnji.

A.d.6. Davanje saglasnosti za ratificiranje Sporazuma o finansiranju između Bosne i Hercegovine i Komisije Evropskih zajednica u pogledu “Jadranskog prekograničnog programa saradnje u okviru IPA-e” u okviru instrumenta za pretpristupnu pomoć;

Predsjedavajuća Komisije je na početku podsjetila da je Predstavnički dom PSBiH dao saglasnost za ratificiranje ovog sporazuma na 63. sjednici, održanoj 4.11.2009., te pozvala predstavnika nadležnog ministarstva da članovima Komisije da kratko uvodno obrazloženje.

Predstavnik nadležnog ministarstva Almir Kapisazović, šef odsjeka u Ministarstvu finansija i trezora BiH, dao je uvodno obrazloženje. Istakao je da je Evropska komisija u martu 2008. godine usvojila ovaj Program prekogranične saradnje koji obuhvata jadranski region. Naglasio je da je za realizaciju Programa neophodno potpisivanje ovog sporazuma jer se njime definiraju procedure koje se tiču isplate tranši pomoći i uslovi pod kojima se pomoć raspoređuje, uključujući odgovarajuće metode i odgovornosti za realizaciju Programa. Rekao je da su sredstva za sufinansiranje osigurana u budžetu te da Sporazum ne zahtijeva donošenje novih ni izmjenu postojećih zakonskih rješenja.

Nakon uvodnog izlaganja predstavnika nadležnog ministarstva, *Komisija je jednoglasno odlučila da predloži Domu naroda Parlamentarne skupštine BiH davanje saglasnosti za ratificiranje:*

- *Sporazuma o finansiranju između Bosne i Hercegovine i Komisije Evropskih zajednica u pogledu "Jadranskog prekograničnog programa saradnje u okviru IPA-e" u okviru instrumenta za pretpristupnu pomoć*

A.d.7. Razmatranje informacija Ministarstva vanjskih poslova BiH:

- **Informacija o sastanku ministara odbrane Evropske unije, Geteborg, 29.9.2009.;**
- **Liberalizacija viznog režima - Informacija Misije BiH pri EU o razgovorima s pojedinim članovima COWEB-a;**
- **Liberalizacija viznog režima – sjednica Komiteta za građanske slobode, pravdu i unutrašnje poslove Evropskog parlamenta (LIBE), Strazbur, 19.10.2009.;**
- **Liberalizacija viznog režima – Informacija Misije BiH pri EU o sastanku u Generalnom direktoratu za pravdu, slobode i sigurnost, Brisel, 14.10.2009.;**
- **Informacija o sjednici Vijeća EU za vanjske poslove, Luksemburg, 27.10.2009. godine – Diskusija o BiH tokom neformalne večere ministara vanjskih poslova zemalja članica EU;**
- **Izjava Eduarda Kukana, šefa delegacije Evropskog parlamenta za odnose s Albanijom, BiH, Crnom Gorom i Kosovom, u vezi sa Izvještajem Evropske komisije o napretku za države zapadnog Balkana;**
- **Informacija o rezultatima parlamentarnih izbora u SR Njemačkoj, održanih 27.9.2009.**

Alija Muminović, šef odsjeka u Ministarstvu vanjskih poslova BiH, rekao je da Ministarstvo, na osnovu svojih zakonskih ovlaštenja, nastoji blagovremeno i autentično obavještavati zakonodavnu i izvršnu vlast o napretku u realizaciji obaveza iz Mape puta, te je u tom kontekstu zadužilo DKP-a Bosne i Hercegovine u zemljama Evropske unije da sumiraju političke stavove zemalja koji se tiču proširenja članstva Evropske unije i liberalizacije viznog režima. Istakao je da su sve priložene informacije proslijeđene zakonodavnoj i izvršnoj vlasti radi informiranja i zauzimanja stavova u sadašnjim i budućim bilateralnim kontaktima s predstavnicima Evropske komisije, Evropskog parlamenta i drugim zvaničnicima Evropske unije.

Nakon izlaganja Alije Muminovića, članovi Komisije primili su k znanju sve informacije Ministarstva vanjskih poslova BiH, a vezano za Informaciju o parlamentarnim izborima u Saveznoj Republici Njemačkoj zaključili su da predlože Domu naroda Parlamentarne skupštine BiH da uputi čestitku novoizabranim predstavnicima u zakonodavnoj vlasti Savezne Republike Njemačke, izabranim na parlamentarnim izborima održanim 27.9.2009.

A.d.8. Razmatranje izvještaja o međunarodnim aktivnostima komisija i parlamentarnih delegacija PSBiH:

- **Izvještaj s četvrtog dijela redovnog zasjedanja Parlamentarne skupštine Vijeća Evrope za 2009. godinu, Strazbur, od 28. septembra do 2. oktobra 2009.;**
- **Zabilješka sa zajedničkog sastanka Komisije za vanjsku i trgovinsku politiku, carine, saobraćaj i komunikacije Doma naroda i Komisije za vanjsku trgovinu i carine Predstavničkog doma s delegacijom Grupe prijateljstva Parlamenta Islamske Republike Iran**

Članovi Komisije jednoglasno su usvojili Izvještaj s četvrtog dijela redovnog zasjedanja Parlamentarne skupštine Vijeća Evrope za 2009. godinu, održanog u Strazburu, od 28. septembra do 2. oktobra 2009., i primili k znanju Zabilješku sa sastanka s delegacijom Grupe prijateljstva Parlamenta Islamske Republike Iran.

A.d.9. Tekuća pitanja:

- **Vijeće Evrope: Kandidatura evropske demokratske grupe za predsjedavanje PSVE za 2010.godinu;**
- **Zabilješka sa zajedničkog sastanka Komisije za vanjsku i trgovinsku politiku, carine, saobraćaj i komunikacije Doma naroda i Komisije za vanjske poslove Predstavničkog doma s novoimenovanim šefovima diplomatsko-konzularnih predstavništava BiH.**

Članovi Komisije primili su k znanju informaciju Vijeća Evrope i Zabilješku sa sastanka s novoimenovanim šefovima diplomatsko-konzularnih predstavništava BiH.

Sjednica je završena u 14 sati.

Sekretar Komisije
za vanjsku i trgovinsku politiku,
carine, saobraćaj i komunikacije
Nenad Pandurević

Predsjedavajuća Komisije
za vanjsku i trgovinsku politiku,
carine, saobraćaj i komunikacije
Alma Čolo